



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim

tiryimyim@aolima

tir yimyim

TAPAK 8

Aung San Suu Kyi temang majung lir, saka anepalu mesüdaktsür

Spain tetsür football team caoch asütsü Montse Tome shimogo



VOL. XX NO. 326 (ADOK 326) DIMAPUR YANGTEPNÜ (THURSDAY) RONGJUI (SEPTEMBER) 07, 2023 ₹ 5.00

ABAM-i taonung külemi sarasademtsü ayonger

Impur, Sept.06 (TYO) : Aor Tsüngrem chirtem ajak pei alidak kibong shia nung September 07, 2023 aonung 7:00 nungi 8:00 ako tashi ghonda ka Tsüngrem dang taidok aser taochi meshia sarasademtsü asoshi Ao Baptist Arogo Mungdang nung Executive Secretary, Rev.Dr. Mar Pongeneri sangdong ka ajanga mepishia metetdaksüogo.

Ao limai Khrista yimsü aruba aser arogo tentetba otsü dak aketba maparen nung mepetmesü aliba ajanga Aor tamangertem rongnung tepela aser tesadok mali kümogo, anungji iba mepetmesü ya süngjema kümdaktsütsü atema Tsüngrem dang taochi meshia sarasademtsü ayonger ta ABAM

sangdong nung shia lir.

Naga tenemi Rev.Dr.Clark arur Yisu Khrista temeim osang tajung metetdaksa Aortem amangdaksür külen mezüing Ao arogo tenzükbatsü nung tangatetep kati marutet ser Ao arogo küm 150 ajungbamung amungba sülen, kari ABAM telemtetba anema okadak ken o agüja lir ta angazüker. Iba mepetmesü aser mepetpetetba timtem nungi küzmüking ta Tsüngrem dang arogo purtem külemi tadok aser taochi meshia mepishitsü atema ABAM-i iba sarasadem sentong ya ayongzük.

Iba sarasadem sentong nung amangba purtem kibong ajaki shilem agidaktsüner ta ABAM lenirisa mepishia metetdaksüogo.

NSCN-K (Nikki) den Ceasefire atsülanger

Dimapur, September 6, 2023 (TYO): India sorkar aser National Socialist Council of Nagaland (K) Nikki, Nagaland tsüingda küm ka atema Ceasefire Agreement atsülangtsü mulungtepogo.

"Nagaland state nung teti atema yimjung bener arutsü atema September 8, 2023 nungi September 8, 2024 tashi Ceasefire Agreement atsülanger" ta Supervisor, CFSB

NSCN-(K) Niki Abel Zingrü Thuer, Secretary, CFSB NSCN-(K) Niki Uketo Z Chophy aser Additional Secretary to the Govt of India, Ministry of Home Affairs Piyush Goyal nungeri sign sütepogo.

Ceasefire mapang telok anaprongi Ceasefire Ground Rules sülen anidaktsü aser telok anaprongi mapang shia Ceasefire Ground Rules reprangshitsü.

COCOMI sentong nung nisung 25 yiru

Imphal, September 6, 2023 (Agencies): Bishnupur district nung Bodbarñü sepaitemi tenük amdaktsüba mokozü aser mock bomb amshidang journalist ka dena nisung 25 yiru.

Coordinating Committee on Manipur Integrity (COCOMI)-i Bishnupur aser Churachandpur nung Army-i National Highway nung barricades enoka aliba agientsü atema lokti sentong ka ayongzük.

Imphal valley nung curfew agüja liaka nisung aika COCOMI-i ayongba sentong nung adentsü aru. Parnoki Kwakta ground nungi lungkak aita jajatsü tenzü saka Phougakchao Ikhai nung sepaitemi parnok noktang.

Kasa mapang Phougakchao Ikhai nunga mener lungkak aitba sentong ka agia liasü. COCOMI-i National Highway nung Army barricades agientsü nükjidong liasü aser talisa parnoki Meitei nunger aliba Phougakchao Ikhai nungi Torbung Bangla community

hall tashi nung barricades agientsü apuso.

Ajisüaka Phougakchao Ikhai nung nisung telok adenshiba senshidaktsütsü atema sepaitemi tenük amdaktsüba mokozü aser mock bombs amshi.

August 30 tashi nung Army barricades agientsü atema sorkar aser bangdak ketdangsurtem dang shiogo ta COCOMI-i ashi.

Army barricades aser bulletproof vehicles (Casper) ana lenmang nung ayuba ajanga Meitei nunger senzüsenbongba nung timtemajurur, ta COCOMI-isa ashi.

COCOMI-i Army barricades ji Phougakchao Ikhai nungi Torbung-i belendaktsünür kechiyong Indigenous Tribal Leaders Forum (ITLF)-i tesüiba nung iba tesem nung Kuki-Zo nunger tasü mang 35 aremtsü sentong atonga liasü.

Manipur state sorkari COCOMI dang September 6 nü lungkak aitba sentong meyipa agitsü mepishia liasü.

Kohima Police-i 'No Drone Zone' sangdonger

Dimapur, Rongjui/Sept. 06 (TYO): 14 buba Nagaland Legislative Assembly indang session tanabuba September 11, 2023 nungi September 14, 2023 tashi agitsü sentong aliba mechi Kohima Municipal kübok NLA Complex tasenba aser Chief Minister aliba ki temeket ya item anogotem asoshi security mechi 'No Drone Zone' sangdonger.

Drones, unmanned aerial vehicles (UAVs) amala remotely piloted aircraft (RPA) yimzudaktsütsü memelar aser iba totuyuba nung aibelener nem Directorate General of Civil Aviation ajanga agüja aliba RPA indang UIN/UAOP agientsütsü aser tapet ozüing kübok merenshitsü, ta Kohima Police indang sangdong ka ajanga ashi

CM Rio-i mezüingbuba Jhum Fair cum Chiecha Licha tenzüksü



Nagaland Chief Minister Neiphu Rio-i Chiechama yimtsüing nung mezüingbuba Jhum Fair cum Chiecha Licha tenzüksü dang agiba noksa angur.

Kohima, September 6, 2023 (DPRO): Nagaland Chief Minister Neiphu Rio-i September 6, 2023 nü mezüingbuba Jhum Fair cum Chiecha Licha tenzüksüogo.

Iba sentong ya Chiechamiapfü Mechü Krotho-i Chiechama yimtsüing nung ayongzük.

CM Rio-i Chiechama tetsürtem dang iba ama sentong tajung ayongba atema tenüingsang agütsü.

2023 küm ya alima nung 'International Year Millets' sangdongogo anungji iba fair nung menjang amshiba atema kanga pelar, ta pai ashi.

"Asenoki asen chiyungtsütem kanga junga tezüluba nung rizünga ayutsüla. Asen sobaliba,

inyaksangshi aser achiajemba ajanga alima ainba tajungba kümdaktsür. Iba jagi state sorkari sobaliba, senmang aser chiyungtsütem wazüka ayutsü atema road shows aser benjungtem ayonga amonger aser chiyungtsü asoshi GI tag agütsür" ta CM Rio-isa metetdaksü.

"Iba Jhum fair ya tarutsü nunga agitsü imlar kechiyong iba ajanga asen aluyimertem rongsen tsütsü teyari angutsü. State sorkari aluyimertem yaritsü aser iba atema Agri & allied sectors renlokba nung temulung agütsür" ta paisa ashi.

"Naga nunger chiyungtsü, inyaksang aser sobaliba nung maitsü balaka lir. Ajisüaka

mapang talangka Naga yimten tebilemmsü ajanga industry sector nung asenoki tangar memenep lir. Ano 'Made in Nagaland' products kar lir saka parnok shitak yokyayokji mesüteter" ta CM Rio-isa ashi.

"Nagaland nem tsüingsang-mopung kanga tajung moaja lir aser temo aketba ali ajanga tsünüsenbongtsü ajunga tsünüteter. Anungji Naga nungeri peii tsünütetba yokdoktsü aser agri products balala ajanga senotsü aazüktsü meteta kümogo" ta paisa metetdaksü.

Chiechama, Rusoma, Zadima aser Botsa yimtsüingtem nung farmers market lapoktsü aser iba atema kümshia Rs 40 lakh agütsür, ta Rio-isa ashi.

NSF-i 'Zero Tolerance for Proxy Teachers' tenzüksü rongshir

Kohima, September 6, 2023 (TYO): Department of School Education (DoSE)-i shisaliok reju ajak nungi proxy tesayurtem jangjatsü aser agientsü ayongzük ta Naga Students' Federation (NSF)-i metetdaksüogo.

DoSE-i 'Zero Tolerance for Proxy Teachers' mapa tenzüksüla ta parnoki ashi.

"School Education Advisor Dr. Kekhrie Yhome-i Teachers Day nung state sorkari shisaliok wadang nung temelenshi bener arutsü lemtetba osang sangoktsüba atema tenüingsang agütsür" ta NSF president Medovi Rhi aser general secretary Chumben Khuvung nati sangdong ka nung ashi. s

"Shisaliok wadang nung

temelenshi bener arutsüba ya kanga tongtipang aser iba ajanga asen state nung shisaliok maparen yanglushitsü aser kaketshirtem o tesayurtem ajangzüktsü" ta NSF-i ashi.

"Dr. Yhome-i kanga tasü itta proxy tesayurtem tebilemmsü abenba atema tenüingsang agütsür aser Nagaland sorkari education system nung iba tebilemmsü agientsü atema mapa inyaktsü ayongzük" ta parnokisa ashi.

"Zero Tolerance for Proxy Teachers inyakyim tenzüka shisaliok reju ajak nungi proxy tesayurtem agientsü ayongzük" ta NSF-i metetdaksü.

NSF-isa state sorkar dang attendance atema Bio-Metric System tenzüksü aser sorkar

school ajak nung proxy tesayur ayuba agientsü atema iba mapa inyaktsü mepishia metetdaksüogo.

"Nisung kari yimtenren tesentaktep aliba amshia pei inyaknüba tesemi mapa belener aser iba ajanga teaching-learning process raksatsür. Anungji NSF-i department ajak nung political transfers nung tenük yoktsü aser iba inyakyim azüoktsü atema mapa inyaktsü" ta NSF-isa ashi.

Department of School Education (DoSE) nung temelenshi bener aruba ajanga shisaliok jenjang tajung akümba dang masü saka asen loktiliba renloktsü anungji onoki akokba tashi iba maparen nung state sorkar nungittsü ta NSF-isa ashi.

Dimapur tajungba kümdaktsütsü senden amen

Dimapur, September 6, 2023 (TYO): Naga Council Dimapur (NCD) kübok Dimapur nung amenoka aliba civil societies külem senden ka mena Dimapur nung alirtem indang tebilemmsü lemsatepogo.

Nagaland Governor-i Dimapur semdangdang NCD-i takhangba agütsübatem mapa küma inyaktsü atema Dimapur nung amenoka

aliba kin hoho tem, CSOs aser non-Naga community teloktemi NCD pusema nungittsü senden nung bangjemtep.

Maneni, NCD indang yimyim "One Government, One Tax" mapa küma inyaktsü atema kin hohotem, Unions aser Non-Naga teshimtet nübotem senteper Action Committee ka tentetsü bangjemtepogo.

Action Committee ajanga Dimapur nung tenteta aliba unions inyaksangshi aser temzüing liromedema latetsü.

Senden nung adenertemisa bangdak Department dang Forest Colony nung Unity Shopping Mall lapoktsü aser Purana Bazaar, Dimapur nung Inter State Bus Terminus (ISBT) nung maparen tiptema inyaktsü takhangba agütsü.

Changtongya nung tesayurtem anogo amung



Changtongya town nung Ao kaketshirtem telongjemi ayongzükba Tesayurtem anogo sentong nung tesayurtem asoshi sannükeri sarasademtsüba noksa nung angur (CTN. Sept 05, 2023)

CTN. Sept.06 (TYO) : Changtongya town nung September 05 nü Tesayurtem anogo nung tesayurtem nem tetushi agütsüba sentong ka Ao Kaketshir Telongjem Changtongya Town-i ayongzükba agiogo. Iba sentong nung Changtongya nung SDO (C) Wb.C.Wangan, NCS tetushi tejaoker liasü aser tesayurtem asoshi temoatsü

meshia Changtongya Town Baptist Arogo nung sannüker Rev.Temshii sarasademtsü. Iba sentong nung tesayurtem rongnungi HM Bridges Academy nung tesayur Wb.C.Moatemsü Longkumeri kaketshirtem dang pelaba o lemsatep. Iba anogomung sentong nung Changtongya town kübok aliba government school 7 aser private school 5 nungi tesayurtem aser

kaketshirtem dena liasü. Iba sentong nung lenir AKTCT nung tongti zülur Sp.Imsüaküm liasü aser AKTCT nung tadong tir So.Tiaakümi tarurtem pelaa agizükba shilem agia liasü. Iba sentong lapoka NCRC Changtongya town nung APY Moatemjeni sarasadem aser Nagamese Baptist Church, CTN nung evangelist Limasüngkümi sarasadema tembang.

Angetyongpang nung long poksatsü DC Mokokchung-i melaogo

Dimapur, Rongjui/Sept. 06 (TYO): DEF church aser Yisemyong tsüngta NH 61 (new NH-02) nung two-lane lenmang yanglutsü asoshi Angetyongpang Tzu River area nung long poksatsü atema Deputy Commissioner, Mokokchung, Thsuvisie Phoiji-i sangdong ka agütsüogo. Lenmang ulushiba maparen atema long poksatsü atema Guwahati, Assam nungi JKM Infra Works LLP

construction company nem temelaba agütsüogo. Long poksaba maparen ya September 8, 2023 nikongdang 3:00 ako nungi aonung 10:00 ako tashi inyaksü. Nüburtem aser rongsen kumzükba ayutsü mechi talenba balala agütsüogo. Iba lenmang amshiba nisung takum aser ki o jen kumzükba aser wazükba ayutsü asoshi JKM Infra Works LLP ajanga mapang jelia

nüngdakba mera tem agitsüla. Company yagi Explosives Act/Rule, 2008 nung shia aliba temzüng-ozüng tapet ajak shidak amshitsüla. Iba long poksaba mapang nisung takum mesüra ki o jen samatsüba/raksatsüba lira JKM Infra Works LLP akhuret asütsü. Iba mapa inyaksü asoshi temelaba ya September 8, 2023 atema dang lir, ta sangdong ajanga ashi.

Post-Matric & Merit-Cum-Means Scholarship atema metetdaksür

Dimapur, Rongjui/Sept. 06 (TYO): Technical Education Department indang office ajanga taoba mapang anaben tashi metetdakja aruba den bendenloksema ano department sangdong ka ajanga ashiba agi, Ministry of Minority Affairs, Gol kübok Post-Matric and Merit-cum-Means based scholarship atema apply süa aliba kaketshirtem shirnokisa Biometric Authentication atema

tesem update süa NSP nung nüngdakba document tem upload süogo, parnok Technical Education Department office-i September 7 & 8, 2023 anogotem tsüngtong arutsüla. National Scholarship Portal nung State/District update asüdang technical tsütsü timtem ajuruba Ministry ajanga yanglushiogo. Tang teinyakdak Bio-Metric Authentication exercise dak

sendakba nung tang nungi tenzükba PMS aser MCM scheme dak sendakba osangtsüsang/updates ajak Directorate of Technical Education website dtenagaland.org.in nung Notification Section nung prokshitsü. Anungji iba exercise matem tashi kaketshir dang mapang shia website nung reprangtsü ayongzükba, ta sangdong ajanga ashi.



Mokokchung nung NSCN (K-Khango) nungi züngsem kati .32mm pistol ka aser injang tem bener Assam Rifles matsüngdang bendanga agüja (surrender) liasü. Iba nisungba ya 2015 küm nungi kanga yakyaka liasü aser tashiyim amshia senotsü meshiba nunga densema liasü.

DPC & KPC ajanga asükhulemsateper

Dimapur, Rongjui/Sept. 06 (TYO): Dimapur Press Club indang General Secretary, akangjungla Longchar tetsür Chubala Kichu asübang mang ayimer, ta Dimapur Press Club sangdong ka ajanga ashi. Asür Chubala ya mapang talangka shiranga arur Bodhbarneep Dimapur nung asü. La asenok den meliaka lai mapa tajung inyaka yutsüba asen den teti alitsü, ta sangdong ajanga ashi. Dimapur Press Club ajanga Akangjungla aser lar kinungertem den asükhulemsateper aser asür tanüla teti tatem maka tesunep nung anisüngzükjang ta sarasademtsür, ta sangdong ajangasa ashi. Dimapur Press Club nung

tongti zülur Akangjungla tetsü Chubala Kichu, September 6, 2023 anepdang asüba osang angashia temolung khurema jashir, ta Kohima Press Club (KPC) sangdong ka ajanga ashi. Chubala Kichu ya tasü tait tetsür ka liasü, shiba dak 2019 küm February ita cancer tashidak putetba sülen lai iba tashidak den tasü ita temolungtetba tulu aser tamang agi rara aru. La dang tanüla tajung aliba ajiteta onok ajungmesor aser lai mapa tajung inyakba bilemteta mangyimer kobong tesunep aser anisüngzük angutsü sarasademtsür. La tanüla tesunep nung anisüngzükjangma, ta KPC sangdong ajangasa ashi.

ANCSU ajanga Lima Jamir asükhulemsatep

Dimapur, Rongjui/Sept. 06 (TYO): All Nagaland College Students' Union (ANCSU) nung taoba Games & Sports Secretary (2009-2011), Lima Jamir ajungbena September 5, 2023 nü asüba osang angashia temolung shiranger, ta ANCSU sangdong ka ajanga ashi. Lima Jamir ajungbena asüba ajanga kaketshirtem aser Naga nungertem asoshi takotet lenir ka samaogo, shiba dak yimya tajung jenti liasü aser lokti tentet balala tenzükba aru, ta ANCSU tir Toito D Chishi aser tongti zülur Tenyesinlo Bukh nati sangdong nung ashi.

Kaketshirtem temaba jenjangi ajungkettsü asoshi pai bendanga agütsür inyakba teti bilemtettsü. Pa indang shisatsü aser tajangshibatam mela memelentettsü aser pa kanga menungratsü, ta sangdong ajanga ashi. Asür-i yutsür aoba kinungertem den külemi mang ayimer aser asükhulemsateper. Tulusang Tsüngremi asen molung nung tesunep aser anisüngzük agütsütsü aser asür tanüla teti tatem maka tesunep nung anisüngzükjang ta sarasademtsür, ta ANCSU sangdong ajangasa ashi.

AKM Free Coaching Class Rongjui 11 nü tenzüksü

Mokokchung, Rongjui/September 06(TYO): Ao Kaketshir Mungdang-i(AKM) kaketshirtem asoshi Free Coaching Class agutsüba mapatong Rongjui(September) 11 anogo nungi tenzükba agitsüta AKM Tir Sb.Lanutoshi Aier aser Shisaliok zülur SB.Lanulemba Longchar ajanga AKM sangdong ka nung metetdaksüogo. AKM mendendi ajanga kaketshir shirnokisa iba Free Coaching Class iba coaching class nung adentsü tenung aguja lir parnok ajak prongla shisashiba tsütsü lenla ajak nung tangazükba ngutettsü tamang

akarta shiogo. Kaketshirtem iba coaching class nung satok satoka shisatsü lapoker tangazükba ngutettsü asoshi AKM-i tajungtiba nung achayanga anepalutsü terenemba lirta metetdaksü. September 11 anogo iba Free Coaching Class tenzükba nungtem nung AKM Conference Hall nung 12:Ako nungi tenzükba sarasadem sentong tajung ka agitsü asünung iba sentong nung Coaching class nung adentsü pur kaketshir den tsürabur mesüra guardian anir arua dentaktsünerta AKM-isa kasa sangdong nung metetdaksü.

Conjunctivitis asoshi tekum dangtsü metetdaksür

Dimapur, Rongjui/Sept. 06 (TYO): State nung 2023 küm July ita nungi Conjunctivitis poktetba yong district aika nung school tem shibangtsüsa akum. Aser iba wara dak sendakba nung Department of Health & Family Welfare, Nagaland ajanga tekum dangtsü yimyatem metetdaksüogo. ICMR Dibrugarh, Assam dang sample yokba nung iba wara ya talisa Enterovirus aser bacterial infection temeyoktep kar ajanga lir. Iba virus ya hopta 1-2 tsüngta menatapa aor. Nüburtem ajungtsü mechi Department ajanga tekum dangtsü itemi metetdaksü: **Inyaksü (Do's):** 1. Teka müreka ayutsüla aser teti shidoktsüla. 2. Tenük müreka ayutsüla. 3. Tenük müreksü/aidoktsü asoshi tissue tanük amshitsüla.

4. Kima-yimdong nung protective goggles amshitsüla. 5. Tenük rapangba mesüra tali awakba mesüra tenük nungi nüktzü tali alura tenük doctor dangi aotsüla. **Meinyaksü (Dont's):** 1. Tenük nung tekongshi/tanetshi. 2. Medical prescriptions medeni tenük mozü mamshitsüla. 3. Contact lens meinoktsüla. 4. Tenük makeup mamshitsüla/ lemsatepa mamshitsüla. 5. Nisung kari amshi aliba tenük mozü mamshitsüla. 6. Pei sasa yangluba mozü (süng tu, süngra, süngjanglijang amala) tenük nung meinoktsüla. 7. Mamatzü, natzü amala mamshitsüla. 8. Nisung kar dak conjunctivitis lira, nüburtemi amshiba tesemtem (eg. Schools, Offices, Churches, Markets Etc.) nung mesenzütsüla.



New Delhi nung G20 züngsem linüktem nungi lenirtem senden amentsü aliba tesem 'Bharat Mandapam' noksa nung angur. G20 senden ya September 9-10 anogotem nung amentsü.

China Tiri G20 senden nung madenba ya tang tasen masü: Jaishankar

New Delhi, Rongjui/September 06 (Agencies): Bodhbarnü External Affairs Minister, S Jaishankar-i, China Tir Xi Jinping-i tan hopta New Delhi nung ayongzükba G20 senden nung madenbaji tang tasen masü; pa iba senden nung madenyonga ibaji ajanga telemetba balala agiba nung mekongshitsü, ta ashi.

Osangbener den jembidang Jaishankar-i, September 9-10 anogotem nung alima nung takar linüktem nungi lenirtem senden nungji alima nung kanga tongtibang tebilemtsü onüktem atema telemetba agitsü, ta metetdaksü.

Jaishankar-i, "G20 ya linük aika longjemba sabang ka lir; iba

ya tashi toktepba sabang ka masü. G20 nung kechi telemetbatemsa agir aser alima nung tayongzükba onük balala atema kechi inyaker, ta alimai kanga imlar," ta ashi.

G20 nung züngsem linük 20 ya alima nung rongsenkettzüng tulu aliba linüktem lir, ajisüaka Ukraine nung rara ajanga züngsem linüktem tsüngda telemsa adoka lir.

G20 senden nung Russa Tir, Vladimir Putin aser China Tir Xi Jinping naprongla madentsü, iba denji külemi Ukraine nung rara ajanga linüktem tsüngda telemsa adoka lir, anungji G20 senden nung 'Lenirtem Sangdong' renemba tsütsü timtem adoktsüa akok, ta

ketdangsertemi shiogo.

Jaishankar-i, tesüiba mapangtem nunga lenirtemi G20 senden nung maden, aser China Tiri iba senden nung madenba ya tang tasen masü, iba nungji India atema kecha mali, ta ashi.

2020 küm June ita nung anüdoklen Ladakh sector nung India aser China sepaitem tsüngda raraba sülen linük ana tsüngda tesendaktep ano tamajungba kümer lia taruba G20 senden nung Xi-i madenba ajanga ano tesendaktep tamajungba akümtsü südi.

New Delhi nung ayongzükba G20 senden nung China Tir medentetyonga pa melen China Ato kilonser Li Qiang arua iba senden nung adentsü.

INDIA Coordination Committee senden Sept 13 nü amentsü: Sanjay Raut

Mumbai, September 06 (Agencies): Opposition teloktep INDIA Coordination Committee mezüngbuba senden September 13 nü New Delhi nung amentsü, ta Bodhbarnü Shiv Sena (UBT) lenir, Sanjay Raut-i metetdaksü.

Mumbai nung osangbenertem den jembidang Raut-i, Coordination Committee sendenji Delhi nung Nationalist Congress Party (NCP) Tir, Sharad Pawar'er kidang amentsü.

"India teloktep Coordination Committee mezüngbuba sendenji September 13 nü Delhi nung Nationalist Congress Party (NCP) Tir Sharad Pawar'er kidang amentsü," ta Raut-i ashi. September 1 nü

Mumbai nung Opposition teloktep INDIA (Indian National Developmental Inclusive Alliance) senden tasembuba amenba mapang nung züngsem 14-i akümba coordination committee sangdonga liasü.

Tang tashi nung iba committee nung züngsem 13 tenüng sangdongogo saka tang tashi ano tenüng ka mesangdong.

Coordination Committee nung züngsemtemji- KC Venugopal (Congress), Sharad Pawar (NCP), TR Baalu (DMK), Hemant Soren (JMM), Sanjay Raut (SS), Tejasvi Yadav (RJD), Abhishek Banerjee (TMC), Raghav Chaddha (AAP), Javed Ali

Khan (SP), Lallan Singh (JD(U)), D Raja (CPI), Omar Abdullah (NC) aser Mehbooba Mufti (PDP) nung lir.

Tanüngba züngsem kaji CPI(M) nungi asütsü saka tang tashi meshim.

Sorkari September 18-21 anogotem nung Parliament temeja senden ka ayongzüka aliba dak sendakba nung Sanjay Raut-i, "Kechiba sorkari ajungbena senden ayongzüker? Temeja sendenji kanga kodamasüba tensa nung ang ayongzüker. Iba ya kiyimba benjung ka asü?. Modi asoba anogomong nung benjungteptsü atema asü? Iba ya BJP pur tatem salem sentong asü?. Tebilembaji kechi?" ta asüngdang.

PM Modi Indonesia linüki apusoa ogo

New Delhi, September 06 (Agencies): Tan hopta New Delhi nung G20 senden amentsü lia Bodhbarnü Ato kilonser, Narendra Modi council of ministers aser cabinet senden nung adenba sülen ASEAN-India senden aser East Asia Summit nung adentsü atema Indonesia-i apusoa ogo.

Brihostibarnü pa senden ana nungji adenba sülen kasa anogo nungjisa meyipa arutsü aser tasüngnü linük asem nungi lenirtem den senden amentsü, ta ketdangsertemi metetdaksü.

September 7 anepdang 3:00 ako meta Jakarta atongba sülen

anepdang 7:00 ako nungi pa ASEAN-India senden nung adentsü aser anepdang 8:45 ako nungi East Asia senden nung adentsü. Iba senden temli 11:45 ako nung pa Delhi-i meyipa arutsü.

Hokolbarnü Modi-i US Tir, Joe Biden densema linük asem nungi lenirtem den jurila senden amentsü aser September 9-10 anogotem nung G20 senden nung adentsü.

G20 senden nung US Tir Joe Biden, Japan Ato kilonser Fumio Kishida aser British Ato kilonser Rishi Sunak nung densema linük balala nungi tongti lenirtem adentsü.

Jharkhand nung arasenba atema melung melemi tambur ka tepset

Ranchi, September 06, 2023 (Agencies): Jharkhand kübok Khunti district nung tambur kati arasenba mapa inyaker, ta melung melemi tepsetba ken o nung nisung tenet puogo, ta Bodhbarnü police-i metetdaksü.

September 3 aonung state yimtiba Ranchi nungi kilometer 80 shi pilar aliba Serenghatu yimda nisung kari techira oset agi arrshi küm 65 tambur, Bhanu Munda tepseta liasü, ta police ketdangser kati metetdaksü.

"September 4 nü Arki police

station nung Witchcraft Prohibition Act kübok ken o ka benoka liasü. Iba sülen aibelenertem aputsü atema police-i special investigation team (SIT) ka tentet," ta Khunti Sub-divisional Police Officer (SDPO), Amit Kumar-i metetdaksü.

"Iba ken o nung tai tonglokja nisung tenet puogo, aser parnok rongnung Munda nem tai tongloksüsang aser temenen aridoktsür ka den pa kinüngtsü Biraspati Devi na densema lir," ta Amit Kumar-isa metetdaksü.



September 06, 2023 nü Bhopal nung Chief Election Commissioner, Rajiv Kumar-i osangbenertem senden ka nung jembidang tangokba noksa nung angur. Taküm Madhya Pradesh nung assembly election agitsü atema terenemshiba jenjang asadangtsü atema Rajiv Kumar-i state semdanga lir.

Sonia Gandhi-i Parliament nung onük 9 jembitsü atema mepishi

New Delhi, September 06 (Agencies): Bodhbarnü taoba mapang Congress Tir, Sonia Gandhi-i shidi ka ajanga Ato kilonser, Narendra Modi dang taruba Parliament senden nung onük 9 jembitsü atema mepishiogo.

Laisa Ato kilonser dang, Parliament temeja senden nungji INDIA teloktepi shilem agitsü melunga lir, aser nüburtem atema tongtibang onük benoktsü atema iba maongka agitsü, ta metetdaksü.

Laisa Modi dang taruba Parliament senden nung women's reservation bill atema jembiba sülen Lok Sabha nung agizüktsüla, ta mepishi. Iba bill ya tamalen Rajya Sabha nungbo agizükogo.

Osangbenertem senden ka nung Congress lenir Jairam Ramesh-i, "Sonia Gandhi-i züluba shidi nungji, opposition den mejembitepi iba senden ayongzük, ta shia lir. Laisa iba senden nung jembitsü aliba

onüktem tejangja metetdakang ta shiogo," ta metetdaksü.

Mongolbarnü Congress lenir Sonia Gandhi'er kidang senden amenba mapang nung opposition teloktep INDIA nung aliba party temi Centre sorkar dang Parliament temeja ayongzükba senden nungji kechi onüksa jembitsüar metetdakang ta akhangtsü lemteta liasü.

Kasa senden nungji opposition party temi longjemer Parliament senden nungji adentsü aser Adani onük-a süoktsü telemetba agia liasü.

Parliament temeja senden ya September 18 nungi September 22 tashi amentsü.

Congress Tir, Mallikarjun Kharge-ia, Narendra Modi sorkari tang mezüng kechi onük jembitsü atema Parliament ayongzükerar memetetdaksür, ta ashi.

"Opposition party shinga den-a mejembii Parliament ayongzüker. Iba ya democracy nung tim masü," ta Kharge-i ashi.



September 06, 2023 nü Rajasthan kübok Bhilwara nung Rajasthan Chief Minister Ashok Gehlot aser state Congress Tir, Govind Singh Dotasra nati Congress Tir, Mallikarjun Kharge agizükba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, RONGJUI (SEPTEMBER) 07, 2023

Education department-sa tebenjaba

Nisung meimchir timtem aser tebilemstü koktettsü atema nübortem nem Education agütsütsü asoshi School Education department tenzük saka Nagaland nungbo nübortem tebilemstü koktetba School education department masü saka nübortem nem tebilemstü agütsüba School education department-ang kümogo. Aji oda, tangari masü saka Nagaland School Education Advisor, Dr.K.Yhome-iang Nagaland School Education department ya kanga mejungi benjaa lir ta metetdaksübaji Nagaland shirangdaksüba tashidak ka putetter asütsü. Alima nung tashitemeteter, teshisadanger aser tajangshirtemi ashiba ama, kaketshisatsü ya kin ka tongtoret lir. Aji oda, tongtoret mejungra kodaser nisung ka temang anema alitsü ? Tanü Nagaland junga linür saka melitetter, Nagaland-a nokdakner saka menokdakteter ta asübaji, atangji, tongtoret majungba ajanga lir. Pei lima yimten aser lokti tenzüksü asoshi senso tajung ka küma yanglutsüdakji kaketreju lir. Aji oda, pei lima aser nübortem asoshi teyari tajung agütsür kaka akümtsü atema nisung chi küma yangludakji kaketreju asütsü tim. Alima nung mapang tatsüka alidang, kechi mapa inyakdir inyakaka nendaka aser ochishia inyaksü sayudak aser angazükdakji kaketreju lir. Atangji, kaketrejuji zülutsü aser azüngtsü angazük dak dang masü, ibai nisunger nungdaktem ataloktsütsü shisatsü bushidak lir. Iba jagiang kin ka temang nung kaketshisatsüji tongtoret-a ta ashir. Tanü Nagaland tongtoret nung tashidak alibatem rongnung kaji, School Education Department-i la kübok aliba school-tem nung shitakba (genuine) tesayur kwi aser taila (proxy) tesayur kwi aliar meshitetter ! Ibaji dang masü saka kasa School Education department-i la kübok aliba school shia nung shitakba kaketshir kwi aser taila kaketshir kwi ar mejangjateter. Aji oda, yimtak school azüngerbo mali saka high school tashi upgrade süa yutsüba kolokji Nagaland School Education department kolok lir. Tesem aika nung Government school-tem majungba agi sensaker tanurtema dena fee tulu agüja private school nung timtem aika ajurua züngdaksüba tia mereprangtetbaji Nagaland School Education department tenük lir. Ibaji dang masü anarongdena tanurtem class ter tashi private school nung züngdaksürbo class 11 aser 12 bo sen meindoki government higher secondary school nung züngdaksüner saka iba nungdakjia Nagaland School Education Department-i mereprangteter. Item ajakji tongtoret majungba len nungi adokba timtemtem asütsü. Ashiko, Nagaland School Education department-i la kübok shitakba tazünger kaketshirtem aser tesayurtem shitak lia aoba school-tem kwi aser meshitak ser nung shitak amai sayuba school-tema kwi ar mejangjatsüa akok. Tang dang masü saka taoba mapang nunga Nagaland governor-i dena Nagaland government school-tem nung taila tesayurtem aliba indang yimjak nung jembiba aiben angashiogo, Ajisüaka, ibaji School Education department-i mebentetteter. Aji oda, pei lima aser nübortem tebilemstü kokteta nungdak ajak agütsütettsü atema shisatsü aser tashi bushidak Nagaland government school-tem nung sayurtem aika achiajem nung mazüokba purtem lir, ajisüaka ibaji Nagaland Education Department-i memetet, anungji item tashimaittemji metongshitsütsü aser melenshitsütsü sentong yanglua inyaksübo Nagaland School Education department temulungjang nung maket aser mali. Atangji, Nagaland jungdi süra, Nagaland nung government school-tem ya primary nungi higher secondary tashi nung tazünger kwi aser tesayurtema kwi ta bushia oa khen jungjunga asadanga inyaksü nungdaker. School kar nungbo tazüngerbo lir saka tesayur mali ano school kar nungbo tazünger mali saka tesayurtembo lir ta asüba tesem aika lir. Aji oda, Nagaland nung school ka nungbo tazünger ka dang, anungji paji marura tesayurtem ajak sodi anogo akümer ta asüba government school-a lir. Itemji bentettsüla. Joko, tang nungibo Nagaland nung azüngba aser sayuba kaketshisatsüji ochishir aser nendaka inyakba nisung asütsü angatetdaksüba aser nübortem nungdak agütsütettsüa renemtsüba kaketshisatsü asütsüla. Memenui Dr.Yhomei anir item tebenja ajakji benteta timi inyaka aoba angutsü imlar.

OLEMSABANG

YISU YA SHIBA

~ Dr Toshimanen Ozukum, Kohima

Laishiba nung tongtipangsa Osang Tajung Kaketem nung alima kin, kidong aser oshi ajaki angatettsü atema Yisu ya shiba ta noksa aika amshia züluba Lai bushir kari ngutetba asenok Tir Yimyim azüngertem kar danga temoatsü ngudisü ta bilema yangi kar zülur. Mapang mapang shia Yimobilem züluri asenok angazüksü atema tebilemba tajung aika yimobilem sabang nung züngshiba temoatsü aika ngugo ta bilemer.

Yangi onük ka ama masü saka Yisu kija indang bushitetba noksa yimya nung zülur. Karbosa temoatsü angutsü ta imlar. YISU ya shiba ta süra:-

1. Amtsök yanglurtemi angatettsü atema Paji taküm amtsük.
2. Noksa yanglurtemi angatettsü atema Paji ajak yanglusang.
3. Tzü mesürtemi angatettsü atema Paji Takümtzü.
4. Electricians temi angatettsü atema Paji Alima Tesangwa.
5. Kinü tanur anepalurtemi angatettsü atema Paji mezüng asoba.
6. Architect temi angatettsü atema Paji kinük lung tongtiba.
7. Kisür temi angatettsü atema Paji tamendakdak kimong.
8. Anü, ita aser petinu bushitem atema Paji Anepdang Petinu.
9. Sen amshirtem atema Paji miima aliba rongsen.
10. Taküm indang shisaluyimertem atema Paji Taküm.
11. Süng mistry tem atema Paji kikümbang.
12. Doctor asr Nurse temi angatettsü atema Paji Taneptsür Tulutiba.
13. Tesayurtem atema Paji Tesayur Tajung.
14. Naro metenertem atema Paji Lenden Labunaro.
15. Narotsüki anepalurtem atema Paji Sharon Naro.
16. Ali telong nung aliba bushirtem atema Paji Putulung.
17. Tsünüsempongtsü anepalurtem atema Paji chichiba tsükmenatsü zü.
18. Wedding Planner tem atema Paji Kiyimsang.
19. Obendangertem atema Paji Ochi Obendangsang.
20. Nisung tepsertem atema Paji Obendanger.
21. Hon taribi atsüngertem atema Paji berem jenjang tulutiba.
22. Shisashirtem atema Paji shisatsü.
23. Nisung yimya shisatangertem atema Paji Tesüngmangtsü Teshisadanger.
24. Oshioyim bushirtem atema Paji O lir.
25. Sannükertem atema Paji Sannüker Tajung.
26. Sepaitem atema Paji Tanishisang.
27. Scientis tem atema Paji Tetenzük aser Tatembang.
28. Tzüngsang mepong takzürtem atema Paji mopung.
29. Lemang asalentong yanglurtem atema Paji Lemang.
30. United Nations atema Paji azüngtsüdar.
31. Zoo nung inyakerem atema Paji Yihuda Molusongzü.
32. San anepalurtem atema Paji Sanchanu.
33. Tsürtem atema molungsüngzüksüji Pa shia aruba Takum.
34. Dokan shishirtem atema Paji jenjang masadangtetba Sempet.
35. Tejenokdak makartem atema Paji Jenokdak.
36. Talidak ki makartem atema Paji Talidak Ki.
37. Tsürabur malir tanurtem atema Paji Tebudi.
38. Yimsüsürtemi angatettsü atema Paji Ochi.
39. Jokdena jajartem atema Paji Kor Temesüng nung amenbaji.
40. Item ajak yagi Yisuji Pa dang ta khuli agütsür.

Anungji temalen agüja aliba tatishitsütem ajak yagi Yisuji ajak yanglusang aser Paji Kibur ta angateter. Iba ama Tulusang Tsüngrem ajak nung ajak dak mamangertem asoshi koda tesasatsüka, ta Tir Yimyim azünger ajak den lemsateper. Tsüngremi moajang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

NBCC-i Kohima nung 60buba Indo-Naga Ceasefire Day among



Kohima, September 06 (TYO): Bodhbarnü Nagaland Baptist Church Council (NBCC)-i Kohima nung 60buba Indo-Naga Ceasefire Day mongogo.

1964 kum nungi tenzuka kum shia September 6 anogo nung Naga Peace Day-a amonger. Iba anogo ya Government of India (GoI) aser Federal Government of Nagaland (FGN) na tsungda ceasefire tezungzüktep agiba anogo lir. Iba maparen ya 1964 kum February 2-4 anogotem nung NBCC-i Wokha nung convention ka ayongzuka amongdang ketdangsua liasü.

Bodhbarnü Chedema Peace Camp nung iba anogomong sentong nung jembidang Chakhesang Baptist

Church Council nung taoba mapang Executive Secretary, Rev. Khrotso Mero-i, "Mezüng nungi Naga nung ya nüchiso aliba nüburttem liasü. Linük kati danga asenok makok. British nung aru aser Khonoma den Kikrüma nung den rara; parnoki yim ana den ya azü tokshia rara, ajisüaka British nungeri asenok mazüoktet. Asenok ya 'Mongoloid' nüburttem aser nüchiso nüburttem ta meteta liasü. Yim shiaji shinga kübok mali," ta ashi.

Paisa, 1964 kum Wokha nung NBCC mungdang ali aser iba mapang nungji GOI aser Federal Government of Nagaland na tsungda yimjung atema bangjema liasü, ta ashi. Anungji Peace Mission ka

tentet aser züngsemtemji taoba mapang Assam Chief Minister Chaliha, nüchiso atema rarar Jayaprakash Narayan aser England nungi missionary Rev. Michael Scott nung liasü, ta shia pai, NBCC lenirtem den Peace Committee sendenji Sakraba, Phek District aser Chedema, Kohima district nung amenba mapang nung GOI aser Federal Government of Nagaland na tsungda yimjung alitsü atema bangjema liasü, ta ashi.

"Iba anogo ya Arogo balala aser yimtenren telok balala nungi süaka Naga nung ajak atema anogo lir," ta pai ashi.

"Iba anogo ya tarutsü lanurtem dang Naga nung taginüba rajemdaktsütsü aser asen yimtenren tangatetba aser Naga nung puti otsü angatetdaktsütsü anogo ka lir," ta pai ashi.

Paisa, iba anogo ya yimtenren telok balala nungi süaka Naga nung atema taküm tenla agüja asürtem aser tang linük tetenzükdakpur ajak nem akhüm agütsütsü anogo ka lir, ta ashi.

Iba sentong ya Imlongchaba leniba nung agi. Angami Baptist Church Council Tir Rev. Savito Nagi-i Lai zünger sarasadema iba sentong tenzük.

Kasa sentong nung Khamniungan Baptist Church Kohima-i ken ka aten aser Khedi Baptist Church nung pastor, Dr Ruokuovilie Sachü-i sentong tembanga sarasadem.

Madhya Pradesh state nung Khristan tenet bail nung chiok

September 06, 2023: Madhya Pradesh state nung court kati pastor ana den mashisa tetsür ka densema Khristan tenet nem bail agütsüogo; ita ana tejaklen anti-conversion ozüng kübok parnok pua liasü.

September 4 nü Madhya Pradesh High Court Indore bench-i Pastor Anil Chouhan, pastor Suresh Dawar, mashisa Durga Mangilal nung den tanga Khristan pezü nem bail agütsü.

September 06, 2023 nü osangbener den jembidang Pastor Jayakar Kristi-i, "Tiyazü nung parnok nem tai tonglokja liasü. Pastor tem jagi yimtsüng ka semdanga sentong ka agi, ajisüaka ibaji yimsü meyipdaktsüba sentong liasü, ta parnok nem tai tongloktsü," ta metetdaktsü.

"Parnok apubaji anti-conversion ozüng kübok telatetbatem alema lir," ta Pastor Kristi-i ashi.

Pastor ana densema Khristan tenet jagi court ana tashi nung bail meshia liasü saka bail magizükba ajanga parnoki High Court nung kasa temepishiba agütsü.

Khristantem atema ken o jembitsür, advocate Umesh Manshore-i court dang,

Madhya Pradesh Freedom of Religion Act kübok, Khristantem anema ken o benokerji Khristan yimsü agizüker ka mesüra par kinünger ka asütsüla, saka Khristantem anema ken o benokerji ainer ka liasü, ta ashi.

Iba dak alia police-ia 2014 kum Supreme Court tetuyuba anema inyak, kechiyong Supreme Court-i police dang temerenshiji kum 5 tashi tepuokdak ayutsüsa süra tai tonglokja alir nem notice agüjang ta shia lir, ta Manshore-i court dang ashi.

Ken o angadanga sülen High Court-i, "Iba ken o ya bail meshirtem nem bail agütsütsü temsüa aliba ken o ka lir," ta metetdaktsü.

Madhya Pradesh yimtiba, Bhopal nung Khristan lenir, Daniel John-i, "Iba ken o ya anti-conversion ozüng alema inyakba aser iba ozüng tim mesüi amshiba ken o lir," ta ashi.

Madhya Pradesh kübok Dewas district police-i July 16, 2023 nü Khristantemji pua liasü. Nisung ka tenüng agi Tukaram den tangar nisung pongui ken o benokba nung ajemdaker police-i Khristantemji apu.

Hindu nungertem jagi police

dang, pastor ana den tangartem Khristan yimsü agizüktsü atema Hindu nung kar mesüzüker, ta police nem metetdakja liasü.

Parnokisa, Khristantem Hindu nung tsüngremtem tenüng menüktsür, ta shia Madhya Pradesh Freedom of Religion Act, 2021 ozüng kübok Khristantem aputsüla, ta ashi.

Pastor Kristi-i, "Right-wing Hindu züngsemtem jagi pastor ana dak tama azükba sülen police ket nung agütsü," ta metetdaktsü.

September 6 nü osangbener den jembidang Daniel John-i, "Anti-conversion ozüng tasenba kübok state nung Khristantem alitsü majung kümogo," ta ashi.

John-i, "Ozüng tasenba kübok Khristan kati Hindu nung timtemer ka nem chiyungtsü agütsüra, ibaji Khristan yimsü dangi meyipdaktsütsü atema mesüzükba lir, ta tai tonglokja jail nung puoktsüa akok. Nisung mashie kati Khristantem anema ken o benoktsüa akok, iba sülen Khristantem aputsü aser jail nung puoktsü," ta ashi.

Nütsüng million 72 aliba Madhya Pradesh state nung nütsüng shilem 0.29 dang Khristantem lir.

ANOGO ABEN TSÜNGREM DEN

Tsüngrem nungi senmang

T.Ken 127:1-5.

Kinü tanur tetsü nu menden nung alidang raksaa endokbaji tejashitsü lendong lir. Tetsü nu mendenji leper kümdaktsür.

T.ken 127 nung ashir, "Angang chirnurji Kibuba nungi anguba senmang, aser nu menden tejangji pa tajangzük lir. Temeranger nisung ket nung lijakjang ama, yamaji atura mapang asoba chirnur lir. Nisung shibai pei lijakjang pungdang sünga tepelatsü. Kodang parnoki parnok tsükchirtem den süngküm nung jembidir, parnok maksüa malitsü"(t.3-5). Ken züluri ashir chirnurtemji rongsen-senmang ka aser Kibuba nungi anguba senmang.

Rongsen jagi asenoki kechi inyaktsü ? Mezüngbuba asenoki aji agizüker. Kodang asen tanurtem asenok dangi arudir, asenoki parnokiji agizüker. Parnokji Tsüngremi asenok nem agütsüba sempet, rongsen ka lir, aser asenoki asen chirtem kümzüktsüla. Parnok masüdang mekümzükbaji kanga dang tai lir.

Idangji asenoki parnokji rizüngtsüla. Asenoki tanurtem dang sayutsüla, angazükdaktsütsüla. Temeshi taküm angazükdaktsütsüla. Parnok takümüji sen rezüngba akümer, aser tajangzük arutsü tenzüker. Tambur-tantsür kümer tepela tulu angubaji lir. Tanurtemi asenok takar kümdaktsür.

Saka tanurtemji nok-o-nüa lir- "Ijak jang temeranger nisung ket nung ali ama" (t.4). Khristantem alima nung Tsüngrem metetba tanurtem mesotetra shibai Kibuba asoshi raratsü? Kodang Tsüngremi alima nung mapa tulu inyakner, pai tila tanur alima dangi bener arur-Mosa, Samuel, Dawid, Yohan Baptisüba aser Kibuba Yisu Khrista. Iba temenen lima nung, kodang ochiba anemer atoker, iba anema noktaktetsü asoshi asenoki "Kibubai yamai ashir ta shitetsüba tanur asenoki sayutetsü tenüngdaktsü.

Chirnurtemji Tsüngremi temoatsü saka ano mapa tulu. Kibuba nungi shisatsü agia tanurtem mesüang. Tsüngremi mulungba ama parnoki tenzüktetsü asoshi parnok renemdakjang aser pai ne nem agütsüba senmang nung pelaa liang.

Iraq nung America nung Khristan ka tepsetba atema nisung 5 aitsü



Stephen Troell's kibong noksa nung angur.

Baghdad, Rongjui/ September 06 (Agencies): Yaküm November ita nung Iraq yimtiba, Baghdad nung America nung Khristan, Stephen Troell tepsetba ken o nung Iraq nung kiralongrar pezü den Iran senso ka aitsüogo, ta ta International Christian Concern (ICC)-i metetdaktsü.

Iba ken o nung Iraq nung aliba court kati par ponguprongla taküm piyong tepuokdak ayutsü obendang agütsü.

Aibelener pongu jagi court dang, parnoki Stephen apuba

sülen pa chioktsü atema sen akhangtsü tebilemba liasü, ajisüaka Stephen gari tanidak mapang nung khaset, ta ashi.

Stephen-i pa kinüngtsü den jala asem toktsür asü.

Stephen'er kibong ya Iraq nung aliba America nung Khristan melungtet telok ka nung inyakba den külemi Baghdad nung aliba English institute ka nung inyaka liasü.

Pai mapang shia Iraq aser Middle East nung alirtem meimba lemsatepba den külemi Khristan tamang indang lemsatepa liasü.

AO OSHI ANGAZÜKDAK:
TANÜ ANGAZÜKTSÜBA OJANG



Sajang

(n) tatsüjang (testicle)

* Tebur dak aketba **sajang** ana tasazük kasasabo masütsü.

Saka

(conj) yamaji süaka, yongjia (but)

* Asenoki tashi manga **saka** Tsüngremibo kanga meim.

OLONG PAITEP # 6628

1				3		4			5
			6		7				
8									
					9				
		10							
11									12
				13			14		
15									
16						17			

TIPIEN

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6627 TELANGZÜBA

TIPIEN :

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

NAI-A YA METETTER MA



Spain nung Cabrales blue cheese ajanga world record tasen ka yangluogo. August 2023 tatemlen auction ka nung blue cheese seret 2.2 nung €30,000 (Rs 27 lakhs shi) agi yokdok. Iba kasa nisung yagi 2019 kum world record yangluba blue cheese alizüka liasü.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Manipur Kuki MLA aser teloktemi Mizoram CM den ajurutep



Manipur Kuki MLA aser teloktemi Mizoram CM den ajurutepdang tangokba noksa angur.

Aizawl, September 6, 2023

(Agencies): Manipur nungi Kuki MLA 10 aser Civil Society Organisations (CSOs) den SoO groups-i September 6 nü Mizoram chief minister Zoramthanga den ajurutepogo.

Manipur nung nisungtem timtema atema kanga sasaa bilemer ta Chief Minister Zoramthanga-i ashi.

"Telok balala aser public den asüngdangtepa mapa inyaka ao"tsü aser Mizo nungeri külem adianutem nüngdakba mapang yaritsü renema lir" ta Zoramthanga-

isa ashi.

Iba senden nung Minister aser MLA tem, Mizo People's Convention, Kuki Students' Organisation, Hmar Inpui, Committee on Tribal Unity, Zomi Council Student Organization lennirtem aden.

Manipur hill districts nungi Kuki MLA 10 den SoO groups aser Kuki CSO ajanga ketdangsubaren balaka meshir.

September 1 nikongdang New Lambulane, Imphal nung Kuki volunteers 24 kumzükba sülen Kuki Inpi Manipur ajanga Kuki aser Meitei nunger balala

akümba metetdakja liasü.

KIM-i India sorkar dang Suspension of Operations kübok alir United People's Front (UPF) aser Kuki National Organization (KNO) den yimten olemtep alitsü takhangba agütsüogo.

"New Lambulane nung Kuki volunteers-i Meitei nunger dang nungi Kuki nunger ki aser rongsen nüka aru. Meitei nunger amaktsü tsübuba agi security personnel-i parnok anien" ta KIM Information and Publicity Secretary Janghaolun Haokip-i ashi.

Assam sorkari süngdong aika tema world records yanglutsü

Guwahati, September 6, 2023 (Agencies): Assam sorkari September 17 nü 'mass tree plantation drive' ka agia world record yanglunür.

"September 17 nü Assam ajungalen women self-help groups züngsem lakh 40 shi kati süngdong anana atemtsü. Parnoki süngdong lakh 80 atemtsü aser tanüngba süngdong lakh 20 ji Anganwadi workers, tea garden workers, sorkar ketdangsurtem, police & forest battalions aser public-i atemtsü" ta Assam Chief Minister Himanta Biswa Sarma-i ashi.

State sorkari tree plantation ajanga world records 6 ajangettsü aser tasen 3 yanglutsü ta paisa ashi.

Iba maparen ajanga Guinness World Records 9 yanglutsü alizüng lir ta Assam sorkari metetdaksüogo.

Guinness World Records 9 ji- largest spiral of saplings; largest number of saplings distributed in a day at one venue; most trees planted in 1 hour; most trees planted in 24 hours; most team planted in 1 hour by a team of 100; largest planted tree mosaic; largest photo album of people planting

trees; most pledges taken to plant trees to protect them; largest nature conservation lesson online/offline lir.

Mahatma Gandhi tasoba anogo den külemi iba sentong agitsü ta sorkarisa ashi.

Assam sorkar mega plantation drive "Amrit Brikshya Andolan, 2023" ajanga seedlings crore 1 tema atemtsü. September 17, 2023 nü Jan Bhagidaari model nung süngdong 1.46 crore atemtsü.

September 5, 2023 tashi nung seedlings lakh 68 tashi Stocking Points balala dangi yokogo.

Manipur ajanga LS election nung mekongshitsü: Ernest Mawrie

Guwahati, September 6, 2023 (Agencies): Taruba Lok Sabha election nung Manipur tebilemsü ajanga tetsükdaksü kecha malitsü ta Meghalaya BJP president-i ashi.

"BJP-i Manipur nung tensa

aziüktsü atema mapa ajak inyakogo. Union Minister Amit Shah-i Manipur nung anogo asemnü among aser Union Minister for State (Independent Charge) Jitendra Singh-ia anogo

20 jungnüa mongogo" ta Ernest Mawrie-i ashi.

Manipur tensa aziükogogo aser state nung BJP MLA temi pei pei menden nungi takok angutsü, ta paisa ashi.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA**

No. DTE/MIN/4/2022/6

Kohima dated the 6th Sept, 2023

NOTIFICATION

In continuation of this office even letter number, dated 8th August, 2023 and 4th Sept, 2023, this is to inform students who have applied for Post-Matric and Merit-cum-Means based scholarship under the Ministry of Minority Affairs, GOI that only those students who have updated their place of Biometric Authentication and uploaded the necessary documents in NSP may report to this office in person as scheduled on 7th and 8th September, 2023.

2. Meanwhile, it is also informed that technical glitches/error while updating the State/District at National Scholarship Portal is being addressed by the Ministry.

3. With regards to ongoing Bio- Metric Authentication exercise, from now on, all information / updates on PMS and MCM scheme related to this exercisewill be disseminated through the Directorate of Technical Education website dtenagaland.org.in under Notification Section. Students are advised to check the said website regularly until the exercise is completed.

(ER.VIPULHOU LHOUNGU)
DIRECTOR.

**GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND: KOHIMA**

Govt. I.T.I TRADE TEST RESULT

Dated Kohima, the 6th September, 2023

NO.DET-7/20/2001 (Vol-VII) : /472 The result of the 100th Trade Test under SCVT held in the month of July / August, 2023 at Government Industrial Training Institutes - Kohima, Dimapur, Kiphire, Mokochung, Mon, Phek, Tuensang, Wokha & Zunheboto is hereby declared and the Roll Numbers of successful Candidates are given below: -

Govt. ITI	Pattern	SCVT	Roll Numbers
1. Kohima	Annual (1 year)	SCVT	Km- 01, 02, 03, 04, 05, 06, 07, 08, 09, 10, 11, 12, 13, 14, 15, 16, 17, 18, 19, 20, 21, 22, 23, 24, 25, 26, 27, 28, 29, 30, 31, 32, 33, 34, 35, 36, 37, 38, 39, 40, 41, 42, 43, 44, 45, 46, 47, 48, 49, 50, 51, 52, 53, 54, 55, 56, 57, 58, 59, 60, 61, 62, 63, 64, 65, 66, 67, 68, 69, 70, 71, 72, 73, 74, 75, 76, 77, 78, 79, 80, 81, 82, 83, 84, 85, 86, 87, 88, 89, 90, 91, 92, 93, 95, 96, 97, 98, 99, 100, 101, 102, 103, 104, 105, 106, 107, 108, 109, 110, 111, 112, 113, 114, 115, 116, 117, 118, 119, 120, 121, 122, 123, 124, 125, 126, 127, 128, 129, 131, 132, 133, 134, 135, 136, 137
	Annual (Private)		Km- 01P, 02P
	Annual (Private) Repeater		Km- 01PR1
2. Dimapur	Annual (1 year)	SCVT	Dm- 01, 02, 03, 04, 05, 06, 07, 08, 09, 10, 11, 12, 13, 14, 15, 16, 17, 18, 19, 20, 21, 22, 23, 24, 25.
	Annual (1 year) Repeater		Dm- 10R1, 13R1
3. Kiphire	Annual (1 year)	SCVT	Kp- 01, 02, 03, 04, 05, 06, 07, 08, 09, 10, 11, 12, 14, 15, 16, 17, 18, 19, 20.
	Annual (1 year) Repeater		Kp- 13R1, 19R1.
4. Mokochung	Annual (1 st year)	SCVT	Mk- 01, 02, 03, 04, 05, 06, 07, 08, 09
	Annual (2 nd year)		Mk- 01, 02, 03, 04, 05, 06, 07, 08.
	Annual (Private)		Mk- 01P, 02P (1 st year), 01P, 02P (2 nd year).
5. Mon	Annual (1 year)	SCVT	Mn- 01, 02, 03, 04, 05, 06, 07, 08, 09, 10, 11, 12, 13, 14, 15, 16, 17, 18, 19, 20, 21, 22, 23, 25, 26.
	Annual (2 nd year)		Mn- 31, 32, 33, 34, 35, 36, 37.
	Annual (Private)		Mn- 01P
6. Phek	Annual (1 year)	SCVT	Pk- 01, 02, 03, 04, 05, 06, 07, 08, 09, 10, 11, 12, 13, 14, 15, 16, 17, 18, 19.
	Annual (2 nd year)		Pk- 07
7. Tuensang	Annual (1 year)	SCVT	Ts- 01, 03, 04, 05, 06, 07, 08, 09, 10, 11, 12, 13, 14, 15, 16, 17, 18, 19, 25, 26, 27, 28, 29, 30, 31
	Annual (1 st year)		Ts- 20, 21, 22, 23, 24
	Annual (2 nd year)		Ts- 14, 15, 17.
	Annual (1 st year) Repeater		Ts - 17R1
8. Wokha	Annual (1 year)	SCVT	Wk- 01, 02, 03, 04, 05, 06, 07, 08, 09, 10, 11, 12, 13, 14, 15
	Annual (2 nd year)		Wk- 12.
9. Zunheboto	Annual (1 year)	SCVT	Zn- 01, 02, 03, 04, 05, 06, 07, 08, 09, 10, 11, 12.
	Annual (1 st year)		Zn- 07, 08, 09, 10, 11, 12.

Note: 1. Trade Certificate / Marksheet will be issued to successful candidates during Convocation.
2. For detail information candidates may contact their respective Head of Institute (Govt. Industrial Training Institute).

**(KOVIMEYASE) NCS
Additional Secretary
& Ex- Officio Director (HoD)**

China nung tzunglu kanga sashia arur; nisung meyirejang aika aninogo



Beijing, Rongjui/September 6 (Agencies):

Typhoon Haikui ajanga tzunglu medangi aruba sülen southeastern China nung tesem aika metsungogo aser iba ajanga Fujian province nungbo school tem shibanga atatsüsa akumba den public transport dena inyaksangshi mesüteti kümogo aser nisung meyirejang aika pei talidak nungi aninogo. Province yimtiba Fuzhou nung küm 12 sülen tang tzunglu tesashitiba arudar, ta weather officials temi ashiba den reservoirs 49 nung tzu kanga aika kümogo, ta metetdaksü. Nisung 36,000 dak tema pei kidangi nungi aninogo, power aser communications tesendaktep raksatsüogo aser alu ayimba ali hectar 4,195 shi metsungogo aser iba ajanga takosa yuan million 552.1 adokdaksüogo. School tema anogo anabuba shibangogo aser metro aser train services sota ata liasü.

tzu kanga sashia ayoimba ajanga motorcycle aser jana bendenba bongdangtem apongtokba social media sabang balala nung video ajanga sayuogo.

Garitema taolen makai aküm aser karbo tzu agi metsungbangba den anentzu aluba ajanga kitem raksaja liasü. Fuzhou nung Mongolbarnü tzunglu 554mm (1.8 feet) arua liasü, ta China indang national forecaster-i metetdaksü.

Kasa mapang nung Fujian kubok tzumetsung aser anentsuh agi kongshitsü ana nung aliba tekumdangtsü metetdaksür aliba tesem trok rongnung Putian aser Quanzhou-a densema lir. Provincial sorkari local ketdangsürtem dang tzumetsung aser anentsuh agi kanga mejungi konshtsü aliba tesemtem nungi nurburtem anintsü atema renema atatsü metetdaksüogo.

Tzunglu ya province kubok central aser south len Hokolbarnü tashi arutsü imlar.

Province kubok Fuzhou aser Fuqing yimti nung yimtung nung

Blinken-i Ukraine semdang, US-i ano teyari agütsütsü

Kyiv, Rongjui/Sept. 06 (Agencies):

US Secretary of State Antony Blinken jelia osang mesangdongi Bodhbarnü Ukraine yimtiba Kyiv tonga aruogo, kong pai ano sen dollar billion ka dak tema indang teyari agütsütsü osang sangdongtsü. Moscow-i Ukraine amak tenzüker ibai Blinken asoshi pezüben buba semdang alitsü aser Russian sepaitem aridoktsü merangba nung takok kar nguogo ta Kyiv-i sangdongba mapang pa arur.

indang military establishment melenshiba mapang Blinken-i semdang.

Sepaitem maneni raraba mapang anüolen linük temi nungdakba ama ochimashi maparen maneni samatsütsü ta Zelensky-i nangzüka lir.

Kyiv-i meyiper Russian sepaitem amak tenzüker ita ishika arudang aser rara tenzüker asükwa tanabuba metenzük tsungta Blinken ya mapang tajung nung arur, ta ketdangsür temi ashir.

Tang tongpang nung parnoki kechi nungdaksü, ta jembishinütsü aser air defence tali agütsütsü mezung südaksütsüla, ta US ketdangsür kati ashir.

United States-i Ukraine nem nok-nü tongtipang tem agüja arur aser iba yongji taküm meyi mapang parnoki Russia ket nungi litsü karbo tanaben rakzüko, saka Russian defence line tesashi aser mine kanga sashia rema aliba mechi terenlok ya imlaba dang nungi tenüshiba.

February ita Russia-i amak tenzüker küm ka ajungba nungtem nung US Tir Joe Biden-i Kyiv semdang ita trok nung Blinken-i semdang alitsü.

Aung San Suu Kyi temang majung lir, saka anepalu mesüdaksür

Yangon, Rongjui/Sept. 06 (Agencies):

Myanmar nung pua aliba taoba lemur Aung San Suu Kyi temang mejungi liaka anepalu mesüdaksür, ta lai jabaso-i ashi.

Kim Aris-i ashiba agi, linük nung yimsü asüba mitkar temi tepuokdak ketdangsür dang pa tetsü tekeratiba nung anepalutsü mepishiba nokdang.

Arishi küm 78 tain Suu Kyi ya tebu kanga anguba ajanga achiam mesüteter, ta osang ajanga ashir.

Ajisüaka mitkar yimsüsür indang odongtar kati Suu Kyi anema lir aser la ya mitkar aser civilian doctor temi temang anepalur, ta ashi.

2021 küm February ita mitkar temi sorkar atsüngdokba mapang nungi Suu Kyi ya tepuokdak yua lir.

July ita la ya tepuokdak nungi Myanmar yimtiba Nay Pyi Taw nung 'house arrest' nung yua lir, saka la ya yimti nung koba tesem ka nung yua aliar mejangjar.

"Tepuokdak shiranga alir ka nem medical teyari magütsüba ya temolung matang aser taochi maliba mapa lir," ta Aris-i text message ka nung BBC Burmese dang ashi.

Arishi küm 46 tain Aris ya UK nung alir aser pa tetsü ya temang manemba ajanga

saktsür aser kanga liasü. mangmanger, ta ashi.

"Tebunü nung iba ama timtem alir ya achiam mesüteter ta ajaki meteta lir aser anepalu shidak mesüra temang ajunga timtem ajurur."

Nobel Peace Prize angula den mapang talangka nungi külemi lia arur kati BBC Burmese dang ashiba agi, la dak 'chronic gum disease' lir aser low-blood pressur agi tim atemer. Ano osang ka ajanga la tebu nung timtemba ya tamajungba kumogo, ta ashi.

La tebu anguba ajemdaksütsü tebilemba nung chiyongtsü tanük aser 'medicated jelly' agütsür, ta osang ajanga ashi.

Myanmar nungi jena orr aliba National Unity Government - linük nung political party ajak lungjemba - ajanga mitkar dang Suu Kyi ama yimten yimsüsür pua alirtem timi anepautsü alima dang jembidaksünüa ajungshia lir.

Alima nung lenir aikati Suu Kyi choiktsü ayongzüka lir aser ano la ama mitkar temi tashiyim amshia sorkar atsüngdokba anema longkak aiter meyirijang aika pua lir.

Mitkar temi sorkar atsüngdokba sülen Myanmar nung civil war ama akum aser nisung meyirijang aika tepseta

Mitkar temi tashiyim amshia parnok anema nokdakertem ajemrepa aser tayimtsü amshia amakba ajanga civilian aika asü. Myanmar mitkar lenirtemi rara mapang mapa tamajung inyak, ta meimchir temeden asoshi nokdaker temi aitsür.

Mitkar temi tashiyim amshia sorkar atsüngdokba alima nung lenir temi aitsü aser Myanmar general aser mitkar meyong company tem nung tenokdangba agütsü.

Mapang ka democracy indang 'icon' ama züngshila Suu Kyi ya democracy asendenshitsü asoshi inyakba mapang aiben pua lir.

Ajisüaka la de facto leader ama inyakba mapang Rohingya Muslim minority anema azüdokshiba lai senzüka yutsü ta aija la tenüng menük tulu ajuru.

Tang Indonesia nung ASEAN summit aliba mapanga Myanmar mitkar temi tashiyim amshia sorkar atsüngdokba ajanga timtem ajuruba indang onüktem jembia liasü. South East Asian bloc lenirtemi Myanmar nung mitkar temi maneni azüdokshiba aija liasü.

Mitkar temi sorkar atsüngdokba sülen küm ana buba Myanmar ya iba senden nung mejaoker.

Peren nung anogo ana angati football coaching camp kaogo



Dimapur, Rongjui/ September 6 (TYO): Nagaland Sport Association den longjemer Election Department Peren- ayongzüka September 4 aser 5 nü Peren Town Local Ground nung Higher Secondary Schools aser College kaketshirtem atema angati football coaching camp ka ayongzüka katsüogo.

Iba camp ya SVEEP campaign 2023 kübok ayongzüko, koba lanurtem tem nem election dak sendakba nung tangazükba agütsüsü aser election inyakyim nung shilem agidaksütsü nükjidong nung ayongzüka agiogo. Coaching camp nung Peren kübok school asem aser college ka nungi kaketshirtem aser

peren jila nung aliba lanurtemi shilem agia liasü. Camp nung ajak senteper tebur 49 aser tetsür 10-i shilem agia liasü. Mezüngbuba anogo kaketshirtem nem basic football tactics, team play, aser sportsmanship indang tangazükba agüja liasü. Tanabuba anogo asayartem tenetnet team balala kuma

lemsatsü aser temaba jenjang nung tembangba team ana Chief Electoral Officer aser District Election Officer Team tenüng nung final asaya liasü. Tetsürtema CEO aser DEO team tenüng nung final asaya liasü. Football camp dak alia temsüa aliba electors tem ajak atema voter registration drive ka ayongzüka agia liasü. Training

session ya AIFF certified coach tem aser Nagaland Sport Association züngsemtemi achaayanga agia liasü.

Kasa mapang nung State SVEEP Icon aser football asayar Keneinguze Immanuel Pienyu-i, kaketshirtem nem election dak sendakba nung tangazükba agütsü aser electoral roll nung züngoksemstü atema parnok ajungshia liasü.

Anogo ana camp akaba ajanga kaketshirtem a j a n g z ü k d a k t s ü o g o . Kaketshirtem football asaya nung parnok sempet arangtetshidaksüba dang masü saka parnok nem election inyakyim indang aser democracy nung shilem agitsü koda tongtibang iba indanga metetdaksüogo.

FIH Men's Hockey5s World Cup nung India Pool B nung ata lir

Rongjui/September 6, 2023 (Agencies): Asian championship tesüsuba koker aliba India team taruba FIH Men's Hockey5s World Cup atema Pool B nung Egypt, Switzerland, aser Jamaica den ataogo. Iba asayamung ya Muscat nung January 24 nungi 31 tashi asayatsü.

Iba asayamung mezüngbuba nung national team tertroki shilem agitsü. Team tem ya telok pezü kuma lemsatsüogo aser telok shia nung team pezüzü alitsü.

Salalah, Oman nung Honibarnü mezüngbuba Men's

Hockey5s Asia Cup final nung Pakistan goal Pakistan 4-4 (2-0 SO) agi akokba sülen India team iba asayamung atema qualify süa liasü.

Iba asayamung nung Netherlands team Pool A nung Pakistan, Poland aser Nigeria den ata lir.

Australia, New Zealand, Trinidad & Tobago aser Kenya nung Pool C nung lir aser host Oman Pool D nung Malaysia, United States aser Fiji den asayatsü.

"Team tashi tait kar lir. Team ajak mezüngbuba World Champions akümtsü timla nung

iba asayamung nung arua shilem agitsü aser onokia kasaji ajangzüker," ta India captain Mandeep Mor-i ashiba Hockey India sangdong ka ajanga metetdaksü.

"Onok asayadak rangloker inyaksangshitsü aser asaya akoktsü atema onok indang game plan ama asayatsü merangtsü," ta pai shisem.

Hockey 5s ya iba asaya nung super-fast, highly skillful, shorter spectator-friendly format ka lir kong team anaprongla nungi asayar pongungu ground tilaba ka nung asayar.

Spain tetsür football team caoch asütsü Montse Tome shimogo



New Delhi, Rongjui/September 6 (Agencies): Spain tetsür football team coach, Jorge Vilda mapang nungi anentsüba osang football federation (RFEF)-i Mongolbarnü sangdongogo.

FIFA-i RFEF tir suspend sütsüba sülen anogo 10 lir coach-a mapang nungi anenja liasü. Spain-i World Cup akokba sülen asayar Jenni Hermoso dak tebang mesepba atema tir ya suspend süja liasü.

Vilda melena pa indang assistant, Montse Tome shimogo, shiba tetsür nation team anitsü asoshi mezüngbuba tetsür coach asütsü. Tome ya 2018 küm nungi Vilad indang assistant ama inyaka arua liasü aser national team renloka aoba nung lai tongtibang shilem agiogo, ta RFEF-i ashi.

FIFA-i RFEF tir Luis Rubiales suspend sütsüba sülen tentetba board tasenbai Vilda mapa nungi anenja liasü.

RFEF-i, Vilda mapa nungi anentsüba indang kuli tejangja magütsü aser parnok sangdong nung Jenni Hermoso, Luis Rubiales mesüra mepetmesü atokba indang kecha shisema maliasü. Iba melena parnoki Vilda dang kanga pelaba ang lemsatempa liasü.

"Tetsür football asaya renloka aoba nung coach-i tongtibang

shilem agiogo aser iba ajanga Spain world champion kümogo aser FIFA rankings nung tanabuba jenjang nung lir," ta RFEF-i ashi. Tanga sangdong ka ajanga interim tir Pedro Rocha-i, Rubiales-i mebeshitsü yimya beshiba atema tatok meshia liasü.

Vilda, shiba Rubiales den kanga junga sendaktepa liasü pa taoba küm nungi mepetmesü nung liasü. Pa coaching yimya majungba ajanga asayar 15-i pa anema nokdakba sülen pa mepetmesü-i ai. Tetsür asayartemisa tebur asayartem ama parnok danga beshitsü khangha liasü.

Longkak aitba nung densema aliba asayartem timba team nungi anin saka parnok takhangba karbo ataloktsüogo.

Sports presenter Danae Boronat, shibai la indang kaket "Don't Call Them Girls, Call Them Footballers", atema Spain nung nungtugu tetsür football asayartem interview agia liasü lai ashiba agi, Vilda-i asayar tejentem dang interview tem nung koma jembitsü iba amala mesükba tetuyuba balala agütsüba den team junga achaayang masüba atema asayartem Vilad aija liasü.

World Cup akokba sülen Rubiales-i, Vilda nem tenüngsang agütsü aser pa nem küm pezü atema contract tasen ka agütsüba den pa indang itasen küm nung euro 160,000 aliba nungi euro 500,000 ajungketja liasü.

Spain nung temaba jenjang nung aliba asayar 58-i, tang lenirtem kübokbo parnok national team nungi masayatsü ta ashi. RFEF source kati ashiba agi, Vilad aginba ajanga parnok telemetba melenshitsü memelenshitsü iba indang asayartem den mashishitep.

US Open: Shelton, Djokovic aser Muchova nunger semifinal-i iogo



Ben Shelton



Novak Djokovic



Karolina Muchova

Rongjui/ September 6, 2023 (Agencies): Tang asaya aliba U.S. Open tebur kija asaya nung Ben Shelton-i Külem America nunger asayar Frances Tiafoe koka tang mezüngbuba Grand Slam ka semifinal tongtetogo.

Mongolbar aonung Arthur Ashe Stadium nung iba asaya ya Ben Shelton-i 6-2, 3-6, 7-6 (7), 6-2 agi koka liasü.

1968 küm sülen tang mezüngbuba African-American nunger tebur ana Grand Slam ka nung quarter asayaogo aser 2005 küm sülen host linük nungi tebur ana U.S. Open quarterfinal asayogo.

Shelton semifinal nung Grand Slam 23 tashi koker aliba asaya Novak Djokovic den

Hokolbarnü asayatsü. Tebur kija asaya nungsa Djokovic-i Taylor Fritz 6-1, 6-4, 6-4 agi ayong ayonga koka semifinal tongtetogo.

Pa iba asayamung nung semifinal tongtetba ya Grand Slam nung semifinal 47buba tongtetba asütsü, koba tang tashi nung tebur asayartem rongnungi Roger Federer-i dang tongteter liasü aser tang Djokovic aser Federer na kasa kümogo.

Djokovic aser Fritz na tang tashi nung tiben asaya lir aser teben prongla Djokovic-i koka lir.

Asaya nung Djokovic-i unforced errors 26 menaba den medemdangra Fritz-i unforced errors 51 mena liasü.

Kasa asayamung tetsür kija asaya nung Karolina Muchova-i Romania tsür Sorana Cirstea straight sets nung koka US Open semi-finals tongtetogo.

Czech tsür 10th seed asayar Muchova-i iba asaya ghonda ka ser minute 38 nung 6-0, 6-3 agi koka taküm Grand Slam anabuba nung semifinal tongtetogo.

Muchova shiba June ita French Open nung final tonga asaya liasü, la semifinal nung sixth seed America tsür Coco Gauff den asayatsü.

Arishi küm 33 tain Cirstea ya 2006 küm nungi asaya tenzük aser tang agi tanabenbuba-ang Grand Slam nung quarter-finals tongteta liasü.

BILEMDANGANG

"Tamakok magizüktetra takok mongutettsü."